

欽定四庫全書

子部

薛氏醫案卷六



南京中醫藥大學圖書館版權所有

詳校官太醫院吏目臣朱桂

編修臣倉聖脈覆勘

大定四年

薛氏醫案

保嬰金鑑

薛氏醫案

明薛己撰

薛氏醫案

大定四年

一

全幼心鑑云小兒半歲之間有病當於額前眉端髮際之間以名中食三指橫按之兒頭在左舉右手在右舉左手食指為上中指為中名指為下若三指俱熱主感受風邪鼻塞氣粗發熱欬嗽若三指俱冷主外感內傷發熱吐瀉若食中指熱主上熱下冷名中指熱主夾驚食指熱主胸膈氣滿乳食不消○竊謂額間赤色主心經風熱煩躁驚悸若發熱作渴飲水或發叫哭屬本經實熱用瀉心湯以清心火微赤則困卧而悸發熱作渴

飲湯屬虛熱用秘旨安神丸以生心血青黑主驚風腹痛或瘕癥啼叫青黑甚主心腹疼此寒水勝心火為賊邪用益黃散以補脾胃微黃皮燥主驚疳此心經疳症用秘旨安神丸以養心血骨蒸作渴盜汗頭髮乾黃此為腎疳用地黃丸以滋補肝腎。左臉青或兼赤乃肝經風熱項強頓悶發搐目劓瘕癥用柴胡清肝散主之虛熱用地黃丸補之青黑主肝尅脾虛寒驚搐腹痛用六君薑桂溫之微赤主潮熱血虛心躁用秘旨安神丸

佐以地黃丸。右臉赤主大腸實熱氣粗欬嗽發熱飲水用瀉白散若哽氣出氣唇白氣短屬虛熱用五味異功散脾熱所傳用清胃散心火所刑用人參平肺散淡赤主潮熱心躁或大便堅秘用宣明柴胡飲子以疎導其熱如潮熱未止更用鈎藤飲以清肝補脾色青白主欬嗽惡心先用惺惺散解其表邪健其脾土繼以六君子湯調補中氣色青黑主驚風腹痛盤腸內弔此肝木侮脾土用六君子湯加鈎藤鈎以調補元氣不宜治肝

○鼻色赤主脾胃實熱身熱飲水飲食如常用瀉黃散
清熱理脾微赤主脾經虛熱飲食難化而不思食用五
味異功散以補中健脾色深黃主小便不通鼻中乾燥
氣粗衄血乃脾熱傳於肺腎先用濟生犀角地黃湯清
熱養血後用地黃丸以滋益腎水色淡白乃脾氣虛弱
主泄瀉飲食不化用六君子以調補中氣青色主脾土
虛寒肝木所勝用五味異功散加木香炮薑溫中平肝
○頰間色赤主腎與膀胱陰虛有熱而小便不通用四

物湯加山梔以養血清熱赤甚主膀胱氣滯而熱結用
五淋散以分利其邪若鼻準微黃兼右腮微赤乃脾肺
燥熱不能化生腎水用黃芩清肺飲膀胱陰虛陽無所
生用滋腎丸若頰間微赤乃膀胱陽虛陰無所化用六
味地黃丸若兼小腹脹滿或陰囊腫脹屬陰虛濕熱壅
滯用六味丸加車前子牛膝兼脾肺氣虛不能通調水
道者亦用前藥其小便赤色久而尿血亦屬肝腎氣虛
有熱用六味地黃丸主之不應則用補中益氣湯益脾

肺生腎肝若小便後出白津或莖作痛者屬肝經濕熱
先用龍膽瀉肝湯後用六味地黃丸。印堂色青黑主
腹痛夜啼此脾經虛寒脾屬至陰故夜間腹痛而啼用
鉤藤飲色淡白主泄瀉飲食不化屬脾氣虛弱用五味
異功散加木香主之。目內色青主肝經風熱發驚若
直視叫哭屬肝經實熱用抑肝散兼咬牙頓悶屬虛熱
用六味地黃丸色赤主心肝二經發熱抽搐煩躁若小
便赤屬小腸實熱用導赤散若驚悸倦怠屬肝經血虛

用六味地黃丸色黃主脾積少食夜間發熱用四味肥兒丸飲食停滯吐瀉並作用胃苓散去桂加茵陳山梔自解發搐眼眨屬風熱相搏先用柴胡梔子散後用六味地黃丸眼胞微腫主久咳惡心或脾疳食積用五味異功散補脾肺兼肥兒丸以消積滯或目視不明或雀目揩拭眉眼此欲生風也急用抑肝散以解之睛尾紅絲乃肝木勝脾土先用四君子加柴胡山梔後用地黃丸○人中色黃主傷食青主乳食不化噯噫酸腐此脾虛

停滯用平胃散以消積和中色青赤主驚肝氣傷脾用
五味異功散加柴胡以平肝補中○唇色白主吐涎嘔
逆或吐血便血乃脾氣虛弱不能攝涎統血歸源急用
六君子湯調補中氣則諸病自愈切忌涼藥若色赤乾
燥而皺者主脾經有熱發熱作渴口中氣臭大便不通
燥煩不寐先以清胃散治其熱更以六君子湯加黃連
山梔兼補其脾色黃主脾經食積泄瀉飲食不化以六
君子湯溫補中氣色赤兼白主衄血乃脾肺虛熱不能

攝血用聖濟犀角地黄湯以清熱補血兼用六君子以
補脾氣久不愈用麥門冬散或人參補肺湯○口畔色
黃主脾經積熱用清胃散以理脾清熱若唇口搖動主
驚熱不安用五味異功散加山梔鉤藤鉤以補脾平肝
若口流涎唇色紫乃胃氣虛寒也用益黃散若腹中痛
口吐涎水者乃蟲痛也先用蕪荑散後用調中丸不吐
涎者乃積痛也但用五味異功散調補胃氣手足並冷
用理中湯加烏梅溫補中氣則蟲不動而痛自止矣亦

有積痛者或吐后痛止或去後痛止者宜用消積丸消導積滯佐以異功散調補胃氣○耳前微赤此少陽經風熱也用柴胡梔子散生肝血清肝火微黃主睡中驚悸咬牙因肝脾虛熱宜用四君子加芎歸以安神耳輪乾燥主骨疳蒸熱為腎經虛熱也用六味地黃丸補之若小便後出白津或陰莖痒痛者屬肝經濕熱也先用龍膽瀉肝湯後用六味地黃丸若稟父不足或早近女色致小便瀦滯或作痛如淋者急用六味地黃丸補中

益氣湯滋其化源或大小便道牽痛者尤為虛也亦用
前藥加牛膝車前子肉桂救之如手足逆冷或畏寒飲
食陽氣虛寒也急加附子多有生者大抵小兒之症多
因稟賦臟氣不平或乳食寒暑失宜或妊娠飲食起居
六淫七情所致若初病元氣無虧乳食如常發熱壯熱
二便秘結作渴飲水卧不露睛者悉屬形病俱寔當治邪
氣若病久元氣已虧食少發熱口乾飲湯嘔吐泄瀉肢
體畏寒卧而露睛者悉屬形病俱虛當補正氣況今之

小兒元氣與昔不同用藥失宜脾胃先傷豈可泥古方而施治哉余故考諸名家宗諸東垣于凡諸症各補以方藥治者能即色以驗其病察病以固其本斯無失矣是以古之治病望色為先也且驚則氣散脉亂不可專診故必兼察色心鑑云若面色未盡當參之以指脉指脉未盡當參之以面色色脉兼盡無餘蘊矣

治驗

一小兒瘈瘲啼叫額間青黑此驚風肝木乘脾腹中作

痛也先用六君子湯加木香柴胡鈎藤鈎啼叫漸緩更加當歸又二劑而安

一小兒嘔吐不食手足搐搦痰涎上湧手足指冷額黑唇青此腎水勝心火也用五味異功散加木香炮薑頓安乃去炮薑再劑而愈

一小兒煩躁驚悸熱渴飲冷額間色赤此心經實熱所致先用瀉心湯一服稍緩又用柴胡梔子散而瘥

一小兒四肢消瘦肚腹漸大寒熱嗜卧作渴引飲余曰

症屬肝脾名為丁奚哺露也以白朮散為佐佐以徐氏
十全丹月餘諸症漸愈乃以異功散加當歸及六味丸
又月餘尋愈

一小兒患前症諸疳悉具熱如火炙病狀不能盡述朝
用異功散夕用四味肥兒丸月餘諸症稍愈佐以地黃
丸自能行立遂朝以地黃丸夕以異功散及蝦蟆丸數
服而全愈

一小兒四肢消瘦肚腹脹大行步不能狀如蜘蛛頗能